



- **Ocio - Domegna dai orí: la benedisciun dal belorí gnará tignida sön paiun y al tolará pert adöm a signor ploan ma i ministronc y n grup dal cor del dlijia.** Nos sun düc porchel peries da jí belo denant te dlijia! La prozesciun con le belorí sön dlijia gnará ma fata da signor ploan, acompagné da ministronc y cor. Le belorí benedí pón jí da do messa ennant jö da paiun a se do.
- **Pilora da Pasca 2021:** con la Letera Apostolica “Patris corde – Con cör de Pere”, recorda Papa Francesco le 150° aniversar che Sant’Ojep é gnü detlaré patron dla dlijia universala da Papa Pio IX, ai 8.12.1870. Por cösta ocasiun á le Papa orü che al vegni tigní dai 08.12.2020 al 08.12.2021 en “**Ann de Sant’Ojep**”. Porchel ô ince nosta pilora da Pasca recordé cösc Gran Sant.
- **KVW Senioreclub:** en jöbia ai 25 de merz ven i seniore d’Al Plan a dí, ales 14.30, “Les Staziuns” te dlijia d’La Pli; sce al ess da ester bor tomp vegneres dites te dlijia d’Al Plan.



Enformaziuns y termins

„**Cörs dla Val Badia**“ - comunicaziun dal grup de laur: stimada comunité, da püch plü co en n’edema él te plü boteghes de alimentars les scafes “Cörs dla Val Badia”, olache jont pó lascé lassora val’ che ara cumpra sorapró y olache chi co pó avei öga pó se tó le patüc debann. I podun s’emponsé che trec ne s’an anfiga nia da brancé do te botega. Nos renovun l’envit da brancé do. Al é en simbol de solidarieté. Por evité che le patüc da mangé romagni enló o vái cinamai a mal, él gnü ponsé da daorí na **Bancarella dal Mangé** (Banco Alimentare). En iade al’edema vegnel coü adöm le patüc dles scafes, co ven porté tla Bancarella dal Mangé. Cösta é daverta a **Al Plan vigne vendres dales 9:30 ales 11:00, tal local dal Zenter Families Mareo**. Le pröm iade en vendres ai 26 de merz. Chi co pó avei öga de speisa por se enstesc o por la familia, pó gní enló te chel orar. Al ven perié da avei le mascherot y se tó empara na tascia. Sce zacai ne sciafia nia da gní adalerch de porsona, pói telefoné cina ala jöbia al ☎ 333 4762010.

Test COVID: da en dedemesaledema ai 24 de merz peia ia la poscibilité da podei fá tests antigenics debann por döta la Val Badia tla staziun Drive in a Badia, sot ala scora elementara. Vigne lönesc, dedemesaledema y vendres dales 13:00 ales 15:00. Prenotaziuns dal lönesc ennant sön les plates de vigne comun y chi co ne pó nia online dess telefoné te so comun. Al pó jí düc chi co mess fá en test por laoré, fá sport o atri motifs. I cosc dai tests sorantol düc i comuns dla Val Badia.

Döt le bun a: Maria Gabriella Willeit Rindler * 22.03.1933
Lois Craffonara * 27.03.1940
y a düc chi co á santennom y complesc i agn cöst’edema

Impressum: Ploania d’La Pli; redaziun Franz Rigo y Edith Willeit
Comunicaziuns: cina le dedemesaledema sera a Franz Rigo, ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania La Pli de Mareo Santa Maria dal Bun Consei

Ploan: Signor Klaus Sottsas
✉ klsottsas@rolmail.net

Calogna Al Plan: ☎ 0474 501006
Radio de Ploania: 93,00 MhZ

UNITÉ PASTORALA



VAL BADIA
www.unitepastorala.org

Ann B

21.03.2021 - Cuinta domegna de Carsema

n. 17

N'alianza nea

📖 **Ier 31, 31–34 | Ebr 5, 7–9 | Jan 12, 20–33**

Dal Vangelo do San Jan:

Te chel tomp ²⁰ti é valgügn grecc, co orea en la festa de Pasca adoré Idio a Ierúsalem, ²¹jüs pormez a Filipus, co ea da Betsaida tla Galilea, y ti á dit: Signur, i orésson odei Gejú. ²²Filipus é jü y ti l’á dit a André; André y Filipus é jüs y ti l’á dit a Gejú. ²³Mo Gejú ti á rospognü: L’ora é gnüda, che le Fi dal Om ven glorifiché. ²⁴Amen, amen, i ves diji: Sce le granel de formont ne toma nia te tera y mör, romagnel su; mo sc’al mör portel trep früt. ²⁵Chel co é taché a söa vita, la perd; mo chel co arata püch söa vita te cösc monn, la mantignará por la vita eterna. ²⁶Sce önn ô mo sorví, déssel mo gní do; y olache iu sun, danló sarál ince mio sorvidú. Sce önn mo sorvesc, sarál le Pere co l’onoreia. ²⁷Sen á mia anima la ria. Ci dessi pa dí: Pere, salvemo fora de cösta ora? Mo por cösc sunse gnü te cösc monn. ²⁸Pere, glorificheia to ennom! Danló él gnü na usc dal ci: I l’á belo glorifiché y i le glorificará endô. ²⁹La meja co ea lapró y â aldí cösc, dijea: Al á toné. D’atri dijea: N angelo á baié con el. ³⁰Gejú á rospognü y á dit: Nia por me ne n’ea cösta usc, mo por os. ³¹Sen vegnel tigní iudize sora cösc monn; sen gnará sciüré fora le regnant de cösc monn. ³²Y iu, canch’i sará inalzé sora la tera, tirarái düc pormez a me. ³³Cösc dijël, por indiché a ci maniera ch’al dea morí.

I ponsun do: Sön cösc monn comana chi co é bogn da s’la fá avarei con la forza. Vignönn ciara da s’an tó tant che al é bun y chi co é massa debli é sforzes da la dé sö belo atira. Le vangelo ô se mostré che ara va ince atramonter. Gesú s’á dé ca por nos desco en granel de formont co messa morí por che al pói gní do ca vita nea.

I periun: Pere sö al Ci, ensciö, desche en granel toma sön la tera y mess morí á to Fi dé ca söa vita. I te periun: fá che nos tolunse la forza da vire fora dal ejempl de vita de to Fi, chel co vir y regneia con te por dagnora.

Vesco Wilhelm Egger “Sonntagsbibel”

📖 **Letöres dla Domegna dal orí | Festa dal ingres de Gejú a Ierúsalem:**
Is 50, 4–7 | Fil 2, 6–11 | Mc 14, 1 – 15, 47 (15,1 - 39)



Edema liturgica dai 21.03. ai 28.03.2021	
DOM 21.	Cuinta domegna de Carsema <i>Christian, Benedet, Emilie</i>
08:30	gran messa por dōta la ploania <i>oferta por la ploania</i> s.m. por †† Jep, Fonso, Emma y Maria Rovara, Aroth
10:00	s.m. a Al Plan
Lön 22.	<i>Lea, beat Clemens August, Elmar</i>
18:00	s.m. a Al Plan
Ded 23.	<i>Turibio Mongrovejo, Rebeca</i>
07:30	s.m. por vis y †† dla fam. Ploner, Corterei s.m. por i †† d'André
Dem 24.	<i>Elias, Oscar Romero, Caterina, Simon</i>
Jöb 25.	GRAN FESTA DL'ANUNZIAZIUN DAL SIGNUR , <i>Annunziata</i>
→ 18:30	preparaziun y pissia da Pasca por les Uniuns dai Ei y dles Eres <i>con sig. Ulrich Fistill y sig. Klaus Sottsas,</i> s.m. en onú de Santa Maria con Comegnun da Pasca
Ven 26.	<i>Luidger, Larissa (Lara), Tecla</i> → <i>astinonza dla cern</i>
→ 19:00	funziun con les Staziuns (<i>Consei pastoral</i>)
Sab 27.	<i>Haimo, Frowin</i>
→ 07:30	s.m. en onú de Santa Maria y Sant'Ujöp Freinademetz s.m. por † Lois Pedevilla, Soröa
18:00	s.m. prefestia a Al Plan
DOM 28.	domegna dal orí <i>Guntram,</i> FESTA DAL INGRES DE GEJÚ A IERÚSALEM <i>Wilhelm, Ioana</i>
08:30	funziun de benedisciun dal belorí gran messa por dōta la ploania con la Pasciun do San Merch
10:00	s.m. a Al Plan
<i>ampola:</i>	do entenziun de Gabriella Daverda
<i>ministronc:</i>	• dedolönesc y sabeda: Isabel y Marco • jöbia y domegna: Natalie y Lucia
<i>i recordun:</i>	Iustina Agreiter ved. Maneschg † 22.03.2011 Carlo Kehrer, Monza † 23.03.2020




Pröma letöra: **L'alianza de Chel Bel Dio** (*Ieremia 31, 31-34*)

Letöra dal profet Ieremia

³¹Ciarede, al gnará dis – dit dal Signur –, olach'i slüjará jö n'alianza neia con la ciasa de Ísrael y con la ciasa de Iuda, ³²no desco che alianza, ch'i á slüt jö con üsc peri, canch'i i á tut por la man por i condü fora dal Egit. Che mia alianza ái ei rot, sciöben che iü ea so Signur – dit dal Signur –. ³³Cösta sará l'alianza, ch'i slüjará jö do chi dis con la ciasa de Ísrael – dit dal Signur –. I meti mia lege ete te ei y la scrii sö te so cör. Iu sará so Dio, y ei sará mio popul. ³⁴Degün ne ti ensignará plü al ater, an ne se dijará nia plü önn al ater: Conescede le Signur!, mo ei düc, gragn y pici, mo conesciará – dit dal Signur –. Deache iu ti pordoni la colpa, a so picé ne ponsi nia plü.

Scce i lians danter porsones se scherza, spo sansse tan rio che al é dedò da i cují adöm. Le popol de Israel s'á entres endò damané co che l'alianza con Chel Bel Dio, rota a gauja dal picé, podess endò gní fata danö.

Le profet Geremia empomet a cösc popul co á odü ete söa debleza che al sará Chel Bel Dio co fajará aladò che l'alianza nasci danö, deache el müdará le cör dles porsones, el sontará ete te chisc söa lege, el desmonciará la colpa y pordonará le picé. da "Bibia di Sandis"



La Bibia cuntada ai mituns (11)



Les paraboles de Gejú

Tal Nö Testamont ciafunse stories demorveia. Gejú les cuntà ienn ales porsones co ti ascutà sö y ti spiligà empara cosses emportantes por söa vita. A cöstes stories ti dijunse ince nos paraboles. Valch dles plü beles paraboles é:

- la parabola dal somenadú (*Lüca 8, 4-12*)
- les paraboles dal tesur y dla perla preziosa (*Mateo 13, 44-46*)
- les paraboles dla biescia pordüda y dla moneda pordüda (*Lüca 15, 1-10*)
- la parabola dai laoranti tla vigna (*Mateo 20, 1-16*)
- la parabola dal fi pordü (*Lüca 15, 11-32*).

Te trespes paraboles cunta Gejú dal Regn de Dio. Ensciö paridleiel en iade le Regn de Dio con en granel de senf co cresc y ven en gran len. Con cösc ôl se dí: le Regn de Dio é belo atló, ciamó picio desco en granel de senf, mo al crescerá y gnará gran (*Mateo 13, 31-32*).